



.....
Basler Bebbi Stamm 2023

le menu prestige

.....

Sujet:
Ein Bett im Kornfeld
wes Brot ich ess, des Lied ich sing



Présenté par la Clique BBB
L'excellence de Carnaval depuis 1930



*** *Apéritif dînatoire* ***

Feen mir moll mit dr Vorspyys aa
um e weeneli dr Kontäggscht z'haa.

1848 hänn gytigi Gaischter e Termin-Handel grindet
und dermit en erschti, folgeschwääri Bombe zindet.
«Chicago Board Of Trade» haisst das Gschwiir bis jetzt
wo hinder jedi Waizenaären e Dollarzaiche setzt.

Nit dr Handel stoot im Mittelpunggt, sondern s'Spegguliere
vo wellem Eländ kha dr Gwinnsichtig maximal profitiere.
Me kha Wetten uff schlächti Äärnte, s'spiilt khai Ruugel wo
e Mängge hett nyt z'frässe, aber ainigi wäärdre rych drvo.
Im fyyne Steffli dampfe sie Stimbben und siirpfen exquisite Roote
iire Profit isch pflaschteret mit sehr vyyle Doote.
Das nämme die Herrschaften alli schulterezuggend in Kauf
und so nimmt dr näggschi Gang sie duschte Verlauf

Was koschtets:

Dr Verluscht vom Aastand und s'Rächt uff Naarig



*** *Hors d'œuvre chaud* ***

Jetzt frogsch di, was hett das mit dr hyttige Zytt denn z'due
in dämm Gang exblyzier ich Dir das in aller Rue.
Dr Wladimir Put(a)in und sie Oligarche-Drippli
kochen amänd e fuuligs und wiiderwäärtigs Sippeli.
S'russischen Imperium isch au do dr Babbe vom Gedangge
me kha's als Laitmotiv gsee - vomene Gaischtesgrange.
Dr verhassti, pervärtierti Weschte dominiert d'Agrarökonomie
drbby will är au dert dr neu Sunnekeenig syy.

Scho sytt Joore will är dr Getreide-Export koordiniere
und das zämme mit dr Ukraine und Kasachstan orchestriere.
Gmainsam hätte sie dr wältwytti Getreidehandel unter Kontrolle
alli miesste, wool oder iibel, iim dr Respäggt zolle.
Nootwändig isch, ass sich die zwai Länder in si Dienscht dien stelle
jetzt darfsch dreimoll roote welles Land das nit hett welle.

Russland funggtioniert duur monopolistisch Macht
numme so entfaltet dr russisch Bär sie ganzi «Pracht».
D'Absaag vo dr Ukraine fyr das diabolisch Getreidekartell
gfärde sini Plän als Grundnaariggs-Herrschere existenziell.
D'Ukraine duet sich lieber gege Weschteuropa orientiere
hett aagfangen in d'Haafe-Infrastruggtur z'inveschtiere.
Sie wänn autonom syy und kennte in Zuekunft prosperiere
no vyyl iibler, sie kennte mit Russland dirägg konkurränziere.
Das schmeggt weder im Putin, no siine Stiifelknächt
dr näggschi Gang gitt däären Iischätzicg rächt.

Was koschtets:

Em Put(a)im si Gsicht, oder nameloosi Gsichter in unbeschränggter Zaal



*** Amuse-gueule ***

Und jetzt e Gruess uss dr Kuchi
vom Putin sim Koch; Prigoschin
vereedlet mit ere Noote vo Strichnин

Driffsch en an dr Front aa
und nit per Zuefall am Härd
isch di Lääbe subito nyt me wärt!

Zivilischte, Frauen und au Kinder
Sie alli zaale dr ultimativi Priis
bon apétit bi däre «bombe surprise»

Was koschtets:
Das isch im Menu inbegriffe



*** Pièce de résistance ***

Und bist du nicht willig, so brauch' ich Gewalt.
E Zylen uss em Erlkeenig, wo dumpf wiiderhallt.

Mit den erschte russiche Stüfel uff fremder Äarde
hett e wytteri, perfidi Front kennen uffg macht wärde.
Mit voller Absicht leege d'Invasoore Bränd in riisige Gebiet
me gseet numme no verkoolti Äarde, wo dr Weize normalerwyss bliet.
Die enoorme Fyrrwalze sinn nit uusleschbar duur mentschliggi Hand
es kulminiert zem Inferno, zemenen ainzige Flächebrand.
Ganzi Landstrich wärde abgfagglet, vermiint und unverhoole
wärde Weize, Mais, Tragtooren und Äärntemaschiine gstoole.
Dr Diebstaal isch dääwäg gross, d'Nasa kha's uss em Wältall see,
steggt hinter däm Voorgoo amänd e dieferi Idee?

Dr Sinn derhinder isch d'Verknabbig vom Aagebott
es isch Korn gsi fyr dr Export, wo daarbendi Schnäbel stopfe sott.
Wältwytt sinn ebbe 400 Millione Mentsche abhangig drvoor
s'hoochwärtige Getreide uss dr Ukraine gliiferet z'bikoo.

D'Russe versuechen au d'Süd-Ukraine z'eroberen und esoo
d'Kontrollen iiber iiri Schwarzmeer-Hääfe z'bikoo.
Ooni die gitt's khai Schiffspassagen in richtig vo de Wältmeer
doodermit bliiben au d'Määge in vyulen Entwiggligländer leer.
Dr Despoot uss Moskau hätt denn dr ganzi Handel in siine Datze
do zaigt sich aimool mee sy wiiderligi Fratze.

Dr Hunger isch sie Fuschtpfand, won är iiersetzt als Waffe
zem siine menscheverachtenden Absichte Noodrugg z'verschaffte.
D'Naarigsmittelwaffe sott di in dr Nacht nit schloofe loo
und nit d'Erschtwält-Soorg, unter e kalti Duschi miesse z'stooo.

>>>



*** Pièce de résistance ***

D'Veegel stiige, sie wänn d'Troschtlosigkeit hinter sich loo
z'pigge finde sie sowieso nyt me, was selle sie no doo?

Und gnau glych goots de Mentschen in Drittwäld- und Schwelleländer,
iiri Waal; (ver)hungeren oder sich uffhanggen amene Balggong-Gländer.

D'Uno sait, duur dr Priisaatiig vom Waizen und vom Sprit,
kemme sie mit em Budget fyrs Ernäärigsprogramm nimme mit.

Sie mien Prioridäate setze, me kha's nit scheenfährbe
sie nämmes dääne mit Hunger und gänns dääne wo stärbe.

Em Wladi sie Reaggtioon zaigt, wie's um sie psychische Gsundheit stoot,
denn är proggliamt sich sälber as Retter in dr Noot.

Är verspricht dääne Regioone Brot und Erleesig vo iirem Laid
drbyy isch är dä, wo massgääbliig zue dääre Misere biidrait.

S'Kirsi uff dr Daarte isch d'droogig in Richtig Weschte, sie isch impertinänt
so lang euri Sanggtioone gege mi laufe, goot dr Wälthunger nit z'änd.

Was koschtets:

Artillerie-Granate: 119 Millione

Mörser-Granate: 24 Millione

Raggete: 120 Millione

Ryyslaiffer: 23 Millione

et cetera...

E halbi Milliarde pro Daag koscht em Put(a)in sie Wältmacht-Fantasie
Fraid dra hänn d'Aggtionäare vo dr Waffeninduschtrie.

Mit dämm kennt me jede Daag 1.7 Millione Tonne Weizen erwäärbe
es miesste sehr vyyl weniger Mentschen an Hunger stäärbe.



*** Pièce montées ***

Wenn de s'Gfyyl hesch, zem Dessert gitt's liichteri Koscht
so nimm ich dir die Illusion grad zem Aafang, bigoscht!

S'gitt e «coupe de l'enfer» mit Granatpfel-Käärnli
zer Verzierig hett's uff em Däller e Dooteladäärnli.

Dr Put(a)in kha nämmlig mit sinere Naarigsmittelwaffe
in divääärse Dail vo dr Wält kinschtligi Hungersneet schaffte.
D'Folg isch d'Migratioon vo de Mentschen uss dääne Gebiet
und Russland isch garantiert nit s'Land wo sie's aaneziet.

Europa, oder Noordamerika, dert mechte sie aanegoo
und drmit khan är zwai Fliege mit ainere Klabbe schloo.

Är will jo sytt langem dr verhassti Weschte destabilisiere
duur Massemigration loot sich das woorschiielig realisiere.
Und d'Naarigsmittelwaffe macht die ganzi Wält erprässbaa
das isch sie Draum fyr s'grossrussische Ryych, mit iim als Zar.

Ave Wladimir, morituri te salutant
E scheeni Fasnacht mitenenand





Mecht di Bueb bi uns uff d'Drummle haue, oder ins Piccolo spugge,
denn muesch numme folgendi Zahlen uff dim Delifon drugge:
079 792 66 32, Guy Macquat, Obmaa Jungi Garde

